

№356 2013 წლის 24 დეკემბერი ქ. თბილისი

**ტექნიკური რეგლამენტი „საექსპერტო (ოფიციალური) გაზომვების
ჩატარების წესის“ დამტკიცების შესახებ**

პროდუქტის უსაფრთხოებისა და თავისუფალი მიმოქცევის კოდექსის 58-ე მუხლის მე-2 ნაწილის, 103-ე მუხლის მე-15 ნაწილისა და „ნორმატიული აქტების შესახებ“ საქართველოს კანონის მე-12 მუხლის შესაბამისად:

მუხლი 1. დამტკიცდეს თანდართული „ტექნიკური რეგლამენტი „საექსპერტო (ოფიციალური) გაზომვების ჩატარების წესი“.

მუხლი 2. ძალადაკარგულად გამოცხადდეს საქართველოს მთავრობის 2006 წლის 21 ივნისის №118 დადგენილება „საექსპერტო (ოფიციალური) გაზომვების ჩატარების წესის დამტკიცების შესახებ“.

მუხლი 3. დადგენილება ამოქმედდეს გამოქვეყნებისთანავე.

პრემიერ-მინისტრი

ირაკლი ღარიბაშვილი

დამტკიცებულია საქართველოს
მთავრობის
2013 წლის 24 დეკემბრის
№ 356 დადგენილებით

ტექნიკური რეგლამენტი

საექსპერტო (ოფიციალური) გაზომვების ჩატარების წესი

მუხლი 1. გამოყენების სფერო

1. საექსპერტო (ოფიციალური) გაზომვების ჩატარების წესი, „პროდუქტის უსაფრთხოებისა და თავისუფალი მიმოქცევის კოდექსის“ საქართველოს კანონის შესაბამისად, განსაზღვრავს დაკანონებული გაზომვის საშუალებებზე საექსპერტო (ოფიციალური) გაზომვების ჩატარების თანმიმდევრობას, მოთხოვნებს წარმოსადგენი დოკუმენტაციის მიმართ და განმახორციელებელი ორგანოს ვალდებულებებს.
2. ამ წესის გამოყენება სავალდებულოა მეტროლოგიის სფეროში მონაწილე ყველა დაინტერესებული პირისათვის.

მუხლი 2. ძირითადი დებულებები

1. საექსპერტო (ოფიციალური) გაზომვების ჩატარების საფუძველია სახელმწიფო ორგანოების, დაინტერესებული ფიზიკური ან იურიდიული პირების წერილობითი მოთხოვნა (განცხადება).
2. საექსპერტო (ოფიციალური) გაზომვები ტარდება მხოლოდ გაზომვის შედეგების თაობაზე წარმოშობილი დავის არსებობის შემთხვევაში.

3. საექსპერტო (ოფიციალური) გაზომვების ჩატარების ორგანიზებას უზრუნველყოფს საქართველოს ეკონომიკისა და მდგრადი განვითარების სამინისტროს სისტემაში შემავალი სსიპ – საქართველოს სტანდარტებისა და მეტროლოგიის ეროვნული სააგენტო (შემდგომში – სააგენტო).
4. საექსპერტო (ოფიციალური) გაზომვებს ატარებს სააგენტოს მიერ შექმნილი საექსპერტო (ოფიციალური) გაზომვების კომისია.
5. საექსპერტო (ოფიციალური) გაზომვების ჩატარება ხორციელდება მოქმედი კანონმდებლობის საფუძველზე.

მუხლი 3. მოთხოვნები განმცხადებლის მიერ წარმოდგენილი დოკუმენტაციის მიმართ

1. სახელმწიფო ორგანო, დაინტერესებული ფიზიკური ან იურიდიული პირი სააგენტოში წარადგენს განცხადებას საექსპერტო (ოფიციალური) გაზომვის ჩატარების თაობაზე.
2. განმცხადებელი საექსპერტო (ოფიციალური) გაზომვის ჩატარების თაობაზე განცხადებას წარადგენს საქართველოს ზოგადი ადმინისტრაციული კოდექსის 78-ე მუხლის მოთხოვნათა შესაბამისად.
3. ამ წესის მე-3 მუხლის მე-2 პუნქტით განსაზღვრულ დოკუმენტაციასთან ერთად განმცხადებელმა უნდა წარადგინოს:
 - ა) გაზომვის სიზუსტეში ეჭვის შეტანის მკაფიოდ ჩამოყალიბებული არგუმენტაცია;
 - ბ) შესაბამისი ნივთიერი ან დოკუმენტური მტკიცებულება, რომელიც ადასტურებს გაზომვის სიზუსტეში ეჭვის შეტანის საფუძველს (ასეთის არსებობის შემთხვევაში).

მუხლი 4. საექსპერტო (ოფიციალური) გაზომვის განმახორციელებელი ორგანოს ვალდებულებები

1. სააგენტო ვალდებულია განცხადების მიღებიდან ათი კალენდარული დღის განმავლობაში განიხილოს და მიიღოს გადაწყვეტილება საექსპერტო (ოფიციალური) გაზომვების ჩატარების ორგანიზებაზე თანხმობის ან მასზე უარის თქმის შესახებ, რაზეც წერილობით აცნობებს განმცხადებელს.
2. საექსპერტო (ოფიციალური) გაზომვის სამუშაოთა ორგანიზებაზე უარის თქმის შემთხვევაში სააგენტოს მიერ გაგზავნილ შესაბამის წერილობით პასუხში უნდა აისახოს ასეთი უარის დასაბუთებული არგუმენტაცია.
3. საექსპერტო (ოფიციალური) გაზომვების ჩატარების შემთხვევაში წერილში უნდა მიეთითოს გაზომვების ჩატარების თარიღი, დრო და განმცხადებლის ან მისი წარმომადგენლის დასწრების აუცილებლობა.
4. საექსპერტო (ოფიციალური) გაზომვის სამუშაოთა ჩატარების ორგანიზება სააგენტომ უნდა განახორციელოს შესაბამის განცხადებაზე დადებითი გადაწყვეტილების მიღებიდან 15 კალენდარულ დღეში.
5. საექსპერტო (ოფიციალური) გაზომვების ჩატარების თაობაზე საექსპერტო (ოფიციალური) გაზომვების კომისიის შესაბამის ოქმში უნდა მიეთითოს:
 - ა) განმცხადებლის დასახელება, მისამართი, საკონტაქტო ტელეფონი და საექსპერტო (ოფიციალური) გაზომვებზე განაცხადის ნომერი;
 - ბ) გაზომვის დანიშნულება და საექსპერტო (ოფიციალური) გაზომვების სახეობა;
 - გ) გაზომვის საგანი და მისი მონაცემები;
 - დ) გამოყენებული გაზომვის საშუალებების მონაცემები (გაზომვის საშუალებების ტიპი, გაზომვის დიაპაზონი, სერიული ნომერი, გაზომვის საშუალებათა სიზუსტის მონაცემები და გაკვლევადობის შესახებ მონაცემები);
 - ე) გაზომვის შედეგები.
6. საექსპერტო (ოფიციალური) გაზომვის სამუშაოთა კომისიის ოქმს კომისიის თავმჯდომარესთან ერთად ხელს აწერს კომისიის ყველა წევრი.

7. საექსპერტო (ოფიციალური) გაზომვების ჩატარების შედეგების თაობაზე ამ მუხლის მე-4 პუნქტით განსაზღვრულ ვადაში ოფიციალურ ინფორმაციას გასცემს სააგენტო.

განმარტებითი ბარათი
ტექნიკური რეგლამენტის „საექსპერტო (ოფიციალური) გაზომვების
ჩატარების წესის“ დამტკიცების შესახებ“ საქართველოს მთავრობის
დადგენილების პროექტზე

ინფორმაცია სამართლებრივი აქტის პროექტის შესახებ

წინამდებარე დადგენილების მიღების მიზანს წარმოადგენს „პროდუქტის უსაფრთხოებისა და თავისუფალი მიმოქცევის კოდექსის“ 104-ე მუხლის მე-2 პუნქტის შესაბამისად განსაზღვრული დავალების შესრულება, ასევე დადგენილების პროექტით დასამტკიცებელი ტექნიკური რეგლამენტის მიზანია მკაფიოდ ჩამოაყალიბოს „საექსპერტო გაზომვების ჩატარების წესი“.

წარმოდგენილი დადგენილების პროექტით დასამტკიცებელი ტექნიკური რეგლამენტი შედგება 4 მუხლისგან და განსაზღვრავს „საექსპერტო გაზომვების ჩატარების წესს“.

პროექტის მიღებით გამოწვეული საფინანსო-ეკონომიკური შედეგების გაანგარიშება

დადგენილების მიღება არ მოახდენს გავლენას, როგორც სახელმწიფო ბიუჯეტის საშემოსავლო ნაწილზე, ასევე, მისი მიღება არ საჭიროებს დამატებით ხარჯებს სახელმწიფო ბიუჯეტიდან.

პროექტის მოსალოდნელი შედეგი

პროექტის მიღებით ძალადაკარგულად ცხადდება „საექსპერტო (ოფიციალური) გაზომვების ჩატარების წესის დამტკიცების შესახებ“ საქართველოს მთავრობის 2006 წლის 21 ივნისის N118 დადგენილება და ამასთან, სახელმწიფოს მიერ განისაზღვრება საექსპერტო გაზომვების ჩატარების წესი.

პროექტის განხორციელების ვადები

პროექტი არ ითვალისწინებს რაიმე დავალების შესრულების ვადებს.

პროექტის ავტორი და პროექტის წარმდგენი

პროექტის ავტორი და წარმდგენია საქართველოს ეკონომიკისა და მდგრადი განვითარების სამინისტრო.